



Protocol dalla radunonza generala dils 15-08-20

Datum: 15-08-20
Temps: 18:30 uras
Liug: Kiesfang, Vilters

1. Beinvegni ed appell

Rinaldo fa in cordial beinvegni. El spera che la producziun dad Alexi Nay e Marcus Hobi e la vernissascha dil cudisch da Valentin Vincenz hagian plaschiu. El menziuna nossa finamira, da dar caschun ad in ni l'auter artist romontsch da seprentar mintgamai avon nossa radunonza. Per ideas essan nus dalla suprastonza leds ed aviarts.

Rinaldo fa in special beinvegni ad Alberto Palaia, president dalla Uniun Surselva Romontscha, a Hans Stricker, anteriur proffesser da Romontsch all'universitad da Turitg, ad Andreas Gabriel, secretari general ad interim dalla Lia Rumantscha, a Susan Rupp, schurnalista dil Sarganserländer, a nies president d'honor Venanzi Casanova, nies dirigent d'honor Eugen Casanova, nos commembers d'honor Fidelia Staub, Jolanda Kohler, Amadeus Muoth, Cornelia Bigger e Valentin Vincenz. Total ein 41 commembers e 3 hosps presents a nossa radunonza. Seperstgisai ein Marcel Bärtsch, Rochus e Veronica Cadruvi, Marcus Candrian, Carin Deplazes, Silvia Essig, Susanna Gienal, Lidia Janki, Gaudenzia Kalberer, Mathilda Kohler, Karin Ott, Brigitta Paulin, Peter e Rita Rätz, Toni Valaulta, Ursula Venini, Clau Flury, Renata Straub, Agnes Beeli ed Erica Casanova.

Nies president manegia, noss'uniun sappi ins cumpregliar cun in bien migiel vin, inaga ch'ins hagi sentiu il bien fried e priu igl emprem sitg survegni ins gust sin adina dapli. Nossas sentupadas ein tgei cletg nuota in prighel per la sanadat, ellas fan pil pli schizun bein a tgierp ed olma. Rinaldo muossa a nus fetg bialas fotografias dallas occurenzas passadas.

2. Elecziun dils dumbravuschs

Lisa Hendry, Mirjam Bärtsch e Rita Kuoni semettan a disposiziun e vegnan elegidas unanimamein.

3. Protocol dalla radunonza generala 2019

Tuts han survegniu il protocol dil 2019 ensemen cugl invit, aschia che legin buc avon il tal, sche quei vegn buc explizit givischau. Il president fa la damonda tgi che vul approbar il protocol dil 2019? El vegn acceptaus cun in applaus.

In pintga remarca tier il protocol ha nies president tuttina. La Dorli Straub ei morta ella vegliadetgna da 97 onns e buca, sco ei stat el protocol, cun 87 onns. Engraziel a Renata Straub che ha sentiu quei sbagl.

4. Pareris

A: dal president

Nus havein retschert cun gl'invit il pareri divertent da nies president. Perquei vegn quel buc legius avon. El vegn approbaus cun in grond applaus.

B: dal dirigent

- 33avel onn da Eugen Casanova
- naven dils 10-12-18 tochen egl avrel 19 havein nus giu la codirigenta Sandra Carisch, bien engraziament ad ella
- cant per la radunonza generala dils 17-03-19 a Vilters
- concert annual ils 16-06-19 el Kursaal a Bogn Ragaz ensemen cun Rita Bundi e la gruppa "Schwizerörgeli" stau fetg bi cun ina massa hosps, nus havein stuiu metter neu aunc bia sutgas per che tuts hagian plaz



- Eugen ha menau atras sia davosa emprova el schaner 2020, suenter ha Monika Arpagaus surpriu la bitgetta, grond engraziament a lezza!
 - serenada per Venanzi sils 80 sut la bitgetta da Monika ils 1-2-2020
 - dapi il mars 2020 havein nus giu neginas emprovas pli muort il virus Corona, Monika ha denton tuttina tenui il contact e tarmess novas canzuns ed envidau da prender part al precant mintga damaun allas 9:00.
 - Eugen surdat uffizialmein la bitgetta a Monika Arpagaus ed engrazia al chor per quels 33 onns da bialas e mintgaton era stuffias uras. El ha confidanza che Monika meini vinavon il chor cun siu anim e competenza. Engraziel alla suprastonza per il sustegn e per la biala sculptura.
- Nies president fa aunc la remarca che nus hagien mess si ina nova cummissiun pil chor. Quella ha in'incarica consultativa e duei prender giu empauet la lavur alla suprastonza, ella duei far propostas per il cant e sustener la dirigenta.

5. Rendaquen dil cassier...

Nies cassier Retus presenta a nus las cefras ord la bilanza e las pli grondas entradas ed expensas. Ei ha dau in augment da facultad da CHF 1958.95. Christian fa la damonda, daco che las entradas minus las expensas dattan buc era igl augment da facultad presentaus ella bilanza. Retus declara che quellas entradas ed expensas ein buc completas mobein mo las pli impurtontas cefras ein presentadas. Rinaldo engrazia al cassier per sia lavur prestada e surdat il plaid als revisurs.

...e revisurs

Lucas raquenta ch'el seigi serendus ensemen cun Andrea egl iester tochen giu Schmerikon tier nies cassier Retus. Quei seigi stau stupent. A l'entira suprastonza porta Lucas in grond engraziament per igl engaschi ed a Monika per sia lavur veritabla cul chor.

Il cassier Retus fetgi sia lavur sco in da professiun, la cassa vegni menada fin e manedel ed ils quens e las retschevidas seigien tuttas avonmaun. Era il journal dallas bancas seigi in bi mirar cun talas cefras. La revisura Andrea Dellner ed il revisur Lucas Caviezel fan perquei las suandontas propostas: a l'entira suprastonza ed als dirigents seigi engraziau cun in fulminond applaus ed al cassier Retus seigi dau dechargement per il menar la cassa. Quei vegn acceptau unanimamein.

6. Damonda per midada digl art. 16 dallas statutas

La suprastonza fa la proposta da midar igl onn da quen sin la fin digl onn calendaric. Tochen dacheu cuozzava igl onn da quen dad ina radunonza generala a l'autra. Per ch'ils revisurs hagien avunda peda da far la revisiun eis ei denton pli sempel sch'igl onn da quen cuozza mintgamai tochen ils 31.12. Quella proposta vegn acceptada unanimamein.

7. Mutaziuns e honoraziuns

Mortoris

Igl onn vargau havein nus stuiu prender cumiau da dus fideivels commembers da noss'uniun. Ils 24-08-19 ei Anita Degiuliantonio morta ella vegliadetgna da 74 onns. Ella ei stada 32 onns ina fideivla commembra ed ha priu part allas differentas sentupadas. Vinavon ha Bartolome Simeon bandunau la veta terrestras, el ei morts ils 29-08-20 ella vegliadetgna da 90 onns Bartolome ei staus naven dall'entschatta el 1966 nies commember.

En memoria da nos dus commembers passai stein nus ina minuta sin peis.

Entradas ed extradas

Deplorablamein ei in ni l'auter commember e commembra extraus ord motiv da vegliadetgna ni perquei ch'el ni ella han priu dimora pli lunsch naven. Quei ein:

Riccarda Caduff, Marc Elias Solèr, Dumeni Cavelti, Vreni Cavelti, Lucrezia Heini, Arnold Heini, Armanda Comincioli



Per cletg dat ei era il cass cuntrari aschia che nus havein astgau beneventar 9 commembers novs:

Marcus Candrian, Lidia Janki, Hanspeter Cadonau, Luzian Spescha, Susanna Gienal, Ivo Gienal, Renata Straub, Giuanna Neurauter, Ursula Tresp

Giubileums

10 onns

Rita e Peter Rätz

20 onns

Letizia Frick, Rinaldo ed Elisabeth Caduff

25 onns

Nesa Jäger, Lucas Caviezel, Serafin Beer, Annemarie Widrig

Engraziel fetg a tuts giubilar e giubilaras per lur engaschi e lur fideivladad.

Honoraziuns

Rinaldo surdat il plaid a Fidelia cunquei ch'el ha l'impressiun lezza seigi exact l'endretga per far l'honoraziun da Eugen. Ella ha empriu d'enconuscher Eugen ils 18-10-1986 el casti da Sargans. El era in bi um giuven, dynamics ed interessants. Fidelia ha gl'emprem giu empau respect da plidentar el, denton suenter in ni dus migeuls vin ei la curascha stada cheu ed il chor Romontsch ei silsuenter vegnius fundaus cun 10 cantadur/as, cun empremas emprovas ell'ustria "Löwen" a Sargans, cun l'emprema canzun "La rosa mia" e cun in empren concert ensemen cul chor viril da Bogn Ragaz spel Giessensee. Eugen ha menau 33 onns il chor Romontsch Sargans e contuorn cun siu saver e siu humor. El ha organisau concerts, cant en casas da vegls, cant per giubilar e il chor ha era fatg part a fiastas da cant regionalas e cantunalas. Biaras gadas ei il chor vegnius valetaus cun in "fetg bien", Fidelia manegia Eugen ha propi meritau che nus targin la capiala per el "chapon". El num dalla suprastonza e dil chor engrazia Fidelia ad Eugen per 33 onns vargai. Entschiet ha il chor cun 10 cantadur/as ed ussa ha quei excellent chor varga 40 cantadur/as, tgei success. Fidelia giavischa ad Eugen tut il bien per il futur e selegra sin aunc beinenqual biala ura en cuminonza. Eugen e Fidelia survegnan in fulminant applaus.

Nus cantein per Eugen sut la bitgetta da Monika Arpagaus "Il Sursilvan egl jester" ed elegin silsuenter Monika sco nossa dirigenta. Lezza fa era aunc in engraziament e menziuna, ch'ella vesi sesezza sco dirigenta ad interim, tochen che zatgi pli giuven hagi gust da surpender il chor.

Rinaldo supren puspei il plaid ed engrazia a Fidelia per la biala honoraziun ed a Monika per siu engaschi. Nies president honorescha era la lavur da Brigitta Paulin che scriva mintg'onn 90-100 cartas a maun e paga sezza quellas incl. porto. Plinavon ha Brigitta era susteniu l'uniun cun ina donaziun per curclar ils cuosts digl apéro. Nus fagein in grond applaus per siu engaschi e sperein, ch'ella seigi gleiti puspei en gamba e sappi prender part tier ina proxima sentupada.

8. Activitads 2020

Rinaldo raquenta da nossas sentupadas passadas el 2020. Muort corona havein nus stuiu dir giu beinenqual occurenza, denton il cant per Venanzi a Oberschaan ha giu liug ed il puschegn ei staus fetg buns. Plinavon essan nus stai cun gianellas si Schönalden, era quei ei stau in bellezza di da bial'aura, buna neiv e fetg emperneivla cumpignia. La fin fevrer havein nus saviu visitar la casa da medias a Cuera nua che nus havein saviu mirar nua ch'il Radio e la Televisiun Svizra Rumantscha produceschan lur cuntegn, quei ei stau fetg interessant. Per Anita Schneckeburger che ha astgau festivar egl avrel siu 80 avel anniversari cantein nus spontan ina canzun. Ella selegra fetg. Da bunamein tut nossas activitads dat ei fetg bialas fotos sin nossa pagina d'internet.



9. Contribuziun annuala

La suprastonza fa la proposta da schar la contribuziun annuala tier CHF 60.- Quei vegn acceptau unanimamein.

10. Varia

Rinaldo fa attents nus sin la pagina d'internet www.reziabassa.ch ed engrazia a Meinrad, Lea e Mirjam per tgirar la pagina d'internet e quella da facebook.

Sche negin ha aunc remarclas ni damondas vegn la radunonza generala serrada e nus selegrein tuts sin la tscheina meritada.

7-9-2020

Actuara Lea Killias